

Diabierne awor, saliendo for di Wilhelmina Park

Lisette Gomes ta entrega su lista contra abuso sexual di mucha na Parlamento

UN tristesa inmenso ta locual cu a drenta un famia y di cual nan a sa di converti den un lucha, no solamente na defensa di nan yiunan, pero na defensa di yiunan di tur cu ta biba riba e dushi isla aki.

Lisette Gomes a bira e mama cu a representa tur e otro mannan na Aruba y asina a cuminsa un causa na defensa di tur mucha menor di edad cu di un forma of otro a ser sexualmente abusa pa un persona mayor. Un accion di firma cu a cuminsa un luna atrás y cu a ricibi

un sosten y apoyo masal di e comunidad y di cual a bira su forza p'asina sigui padilanti p'asina yega n'e meta cu a pone su dilanti.

Un miyon di danki Aruba y na cada un di esnan cu a pone nan firma riba un pida papel, pero cu lo tin e peso enorme den e cambio cu kier trece den e leynan actual. Lisette Gomes lo ta entregando su firmanan diabierne awor, saliendo for di Wilhelmina Park y cu lo tin cu yega na Parlamento p'asina haci entrega di e lista aki n'e

Presidente di Parlamento y na Minister di Husticia.

Un grupo di sostenedor, instancia, famia y amigo lo ta saliendo for di Wilhelmina Park pa 2or di atardi y lo tin cu yega no mas tarda cu 3or di atardi p'asina haci entrega di e lista aki.

Un suplica grandi ta bay na cada un di esnan cu a sostene e causa aki pa ta presente y compañía e mama aki n'e parti final di su causa y logro. Na entrega di un peticion cu lo por cambia un ley cu lo duna un alivio y un tiki di

consuelo na hopi cu a pasa dor di un tragedia asina y cu sigur lo kier mira e malhechornan aki ricibi un castigo husto pa un desgracia y trauma cu nan a causa na un criatura indefenso. Ta pidi esnan cu lo bay forma parti di e marcha aki pa bin bisti na color blanco, cu simbolicamente ta representa e inocencia di cada un di e criaturanan cu a ser abusa y cu lo exigí nan derecho di ser scucha, protegi, defendi, stima y siguramente respeta dor di adultonan cu ta forma parti di nan bida den un of otro forma.

Presenta n'e marcha aki lo ta sra. Trudy Hassel di Let's Talk, Psicologo Jeffrey di Carlo, Bureau Sostene Mi, sra. Marquez, Polis di Bario di Kudawecha, Parlamentario mr. Andin Bikker, representante di varios otro fundacion y esnan cu tin nos muchanan y nan bienestar na prome lugar.

Un mucha abusa ta un alma destrosa!! Ban stop cu abuso sexual di mucha awor!!